

# افرجوا عن المسجونين السياسيين

(أحرار وراء القضبان)

فؤاد حداد

هذا الديوان نشر عام 1952 تحت عنوان

أحرار وراء القضبان للشاعر فؤاد حداد

## أهدي قصائدي

أهدي قصائدي جهاد وجهاد أقدمها  
لكل مين عاش قصائدي قبل ما انظمها

قصائدي فورة غضب ما قدرت أكتمها  
غناها قلبي وجرح القلب قسّمها

في مصر سوق الذمم العمر موسمها  
في مصر رب الشرف والنخوه مجرمها  
أفواهنا لو نطقت بالحق كممها  
أنوفنا ريحة النتن والكبت شممها  
عيوننا سهد استلمها وجهد سلمها  
رجليننا تحمل جسوننا والا توهمها  
إيدينا لنتاج إيدينا، منع تقدمها  
إن أوشكت بالكلبش الأعمى يصدّمها  
أرواحنا ما لهاش تمن في الوحل يختمها  
أجسامنا قريان لرب الحرب يولمها  
شدت شعورها الصبايا البؤس يتمها  
عرى حيطان السجون جبار وعتمها  
بردت نجوم السما متلفعه بغيّمها  
رأيت بلادي يصبوا الشر في جحيمها  
حفرة مساخر جبال آسيا ما تردمها  
نزعت من صدري ريشه ورحت أرسّمها

قصائدي صرخة معذب طال عذابه ما طال  
إلا شتات من نوازع قلبه ترجمها

يا معذب الجماهير يا ظالم اظلمها  
ومن حياة الكفاف الضيقه احرمها  
جموع تجدد شبابك وانت تعدمها  
يا معذب الجماهير يا باغي كؤمها

في السجن بالجملة عمال فلاحين طلبه  
مجاهدين مجهدين ع البرش نيمها  
وسطونك شهوتك في الخلق حكمها  
راكن على جيوش غريبة بكره نهزمها  
اللي ما حيلتوش مداس حيدوس على رقتك  
واللي بنى صروحك هو اللي يهدمها

قصابدي بنت الجهاد هتأفه هتأفه  
اليأس موت بالأمل دائماً أتممها

**ديسمبر سنة 1950**

## السجن أوله في القتال

انت اللي تهديني السلام والتحية  
وانت اللي يهديك السلام الشهيد  
كافحتو لاجل العدل والحرية  
مات بالحديد وانت احتواك الحديد  
أشباح تعيسه وذكريات حوالي  
والمحرومين المظلومين العبيد  
دنيا وأحرارها السجين والضحية  
رهن الدسايس والزمان البليد  
يا حي في القلب اشتاقت لك عيني  
واتلثفت أيامي والمواعيد  
السبت بعد السبت مر علي  
والسبت بعد السبت كداب عنيد  
مسجون واخوك بيموت في الاسماعيلية  
والدم بيطارد سكك بورسعيد  
وفي السويس دم الصبي والصبيه  
لعنة ثلاث أجيال لفظها الحفيد  
وفي القرن بالدم مصر الفتية  
قامت تكافح في الوباء الجديد  
أرض الوطن أرض الجهاد هي هي  
عاد للشباب الشيخ وعتى الوليد  
بالدم وحي رصاصه إنجليزية  
اللي عجز عن وصفه باقي النشيد  
والدم دم المصري والمصرية  
أصداؤه ضجت في السودان والصعيد  
ممنوع تؤدي واجب الوطنية  
ممنوع تمد لإيد ضحايانا إيد

مسجون أسير أربع حيطان  
في مكان تلمه العين في ثانيه وتحفة  
ضيق ولكن للهموم أوسع مكان  
تقضي النهار تستكشفه

في سجن مبني من حجر  
في سجن مبني من قلوب السجائين  
قضببان بتمنع عنك النور والشجر  
زي العبيد مترصصين

النور ربيعه والصبح  
يوصل إليك محدود محدد بالحديد  
قضببان بتمنع عنك الدنيا البراخ  
مترصصين زي العبيد

في مكانها ويمر الزمن  
قضببان ما بتحسش يا محروم الحنان  
تحلم بسمرا الصبح تسقيك اللبن  
تصحى على الديدبان كمان

قضببان ما ترحمش الضلوع  
قضببان كإن الفجر مشروع انتحار  
قضببان كإن الصبح شمسه من الدموع  
قضببان على جبين النهار

والنيل بعيد بعد التاميز  
في منظر القضبان عساكر الاحتلال  
في نعل سجانك أوامر الإنجليز  
السجن أوله في القتال

السجن إنت بتهدمه  
في كل خطوه الأرض تحفظها أمل  
وبتهدمه في كل بيت أنا أنظمه  
ياللي انت أشعارك عمل

يا للي انت أعمالك بلاد  
السجن إنت بتهدمه في كل يوم

عشته وبتعيشه وحتعيشه جهاد  
ولا يوم يمر علف ونوم

أنا يا سجين قلبي بريء  
دمعي كأنه الطفل بينادي أبوه  
أنا يا سجين قلبي الحريق قلبي طريق  
الموت على اللي يعذبوه  
خمرت مهجتي بالغضب  
وعجنت شعري بمهجتي وعرق الجبين  
وجعلت بوحى ونوحى وصراخى طرب  
ونظمت أغنية السجين

شع نورك في الضلام  
يا بلادي  
وهدى قلبي السلام  
وهداني  
دوى صوتك في السكون  
يا بلادي  
عدى أبواب السجون  
وناداني

الانتقام نادى على ولاد أم صابر  
كلنا صابر ما حدش فينا صابر  
الشهيد ملانا رد بدم قلبه  
ونحتنا ردنا بدم الضوافر  
الحيطان برسومنا وجسومنا عليها  
قلب مصر الحي وعروقه النوافر

نور بلادي في الضلام فتح عيني  
صوت بلادي في السكون نادى علي  
وانا املك جسم تحتاجه بلادي  
وانا ما املكش أروح الاسماعيليه  
حسبوا الخطوه على المصري وسابوا

مصر ممشى للجنود الأجنبيه  
أنا للحرية والعدل جهادي  
وأنا مسجون أنا مظلوم يا بلادي  
الحواجز والسدود بيني وبينك  
والحواجز والسدود صنع الأعداي  
أنا مسجون وبلادي في ثوره، مسجون  
وسلاح الثوره محتاج للأيدي  
يا سجين إليك شعري طائر في سما الأشجان  
عمري ما حانسي الليالي ومجلس الخلان  
أيام حديث الجهاد والشعر يجمعنا  
حب الوطن كان لساننا وحبّه مسمعا  
يا سجين إليك شعري طائر في سما الأشجان  
والشعر بعض الشعور في اللفظ والمعنى

بحق يوم الشهيد خالد على الأزمان  
وبحق جرح الشهيد ضارب في كل مكان  
وبحق نزع الشهيد سابق لكل أدران  
وبحق دم الشهيد سائل على الأوطان  
طالب بحريتك والسجن للسجان

**نوفمبر 1951**



## اقتل صلاح

وقول لبيفن عزيزي..!

قالوا الأطباء لما جسّوا أعضايا  
القلب أضعف من قلوب الولايا  
كثر المياتم واليتامى في بلادي  
وذكرى الشباب الطبيين والضحايا

كثر المياتم واليتامى في بلادي  
وذكرى فتى الوادي تقطّع فؤادي  
ع البرش، مرمي جرعوه الأعادي  
يوم بعد يوم بالقوه كأس المنايا

يوم بعد يوم يشرب سمومه ومُرّه  
يوم بعد يوم الجوع بياكل في صدره  
عض أعضائه ومص الروايا

ع البرش مرمي والليالي بتمضي  
وتحذف الموج ع الحديد المصدّي  
عاشق الحرية والنور يقضي  
شبابه بين أربع حيطان وزوايا

عاشق الحرية والنور شبابيه  
شمعه بتدمّع وطاوي كتابه  
النور ودنيا النور رغيف على بابه  
تاكله الكلاب ويحرموه البقايا

إشبع وجوع في اليتامى وسكّت  
كل مين له عين يطالبك وموتّ  
معدوم ويتجرأ يحاسبك وثبّت  
نيرك على رقاب الجياح العرايا

إشبع وجوع، إوعى توعى لكلامنا  
ظلمك حرمانا حرمانا الرأي من يوم فطامنا  
خش الشتا والبرد طيق عضامنا

عفق في شبابنا ولفق قضايا

إشبع وجوع يا نصير الانجليزي  
واظلم ما دام الظلم فيك شيء عزيزي  
واقتل صلاح وقول لبين عزيزي  
فين عطبره من لندره، والعنايه

يا عطبره يا دمع ع الخد هاطل  
دقت قلوب الحي بين المفاصل  
دقة المسمار في نعش المناضل  
دقة النخاس في ودن السبايا

يا عطبره دقت قلوبنا لصلاحك  
دقة طبول الحرب هبت رياحك  
كأني شايف بكره هزة سلاحك  
هدت صروح الظالمين والغوايه

يا عطبره مين عاش وشاف يوم شهيدك  
شاف الأسود السود تزغرت في عيدك  
غضبان فؤادك باللي فيه الكفايه

أكفانه حمرا والجنازه مظاهره  
واهتف ما دام يوم انتقامه ثوره  
غضبان فؤادي باللي فيه الكفايه

أكفانه من نور الصباح المعطر  
من دموعنا ومن جفوننا وأكثر  
من دمنا ومن زهرة الورد الاحمر  
شمس يومه وشمس وتاره في رايه

وامتى انتصار الرايه دي والمحارب  
في الشرق تحت الرايه دي والمغرب  
عقارب الساعه في قلبي عقارب  
لكن يقين الظلم دا له نهايه

فبراير 1950

## لا السجن سجن ولا الكفن

يا للي انت حكم الداء سميرك  
يا مجاهد ومريح ضميرك  
خبرني عن حق البدن

في سجن مصر وقل لي ليه  
مصر وكيانها مضاف إليه  
سجانه ولا بتسجن

مسجون وليه؟ لاجل الفقير  
لاجل اللي بايت ع الحصير  
لاجل الشرف لاجل الوطن

لاجل العدالة بيظلموك  
والحق لاجله بيحرموك  
حقك ولاجله بئتمهن  
جاب الطبيب سماعته يسمع  
ما قدرش بين أضدادها يجمع  
سمع الأوامر أولاً

خلي الليالي السود تمز  
وتزيد في كاس الحر مز  
لعياك تمن، لشفاك تمن

مالك حزين يا قلبي مالك  
اصبر على الظلم وتمالك  
لو كنت يا ابني يا حسن

من ضهر أغنيا أو أجانب  
الخير يجيك من كل جانب  
تاكل الحياة شهد ولبن

لكن حياة السجن أجمل  
للي حمل جرحه وتحمل  
جرحه في سره والعلن

أعرف صديق إنسان تصوّر  
كان في الزباله جعان يدوّر  
على لقمه أخطأها العفن

يا نفسي أفضل لك تجوعي  
وأفضل على الأيام مجاهد  
لا السجن سجن ولا الكفن

إحنا آمنة بشعبنا  
وانتو كفرتو برينا  
والقرش والنسوان وثن

إحنا الدموع إحنا العر  
إحنا الكتابه على الورق  
إحنا اللي بنمشي الزمن

نكر المرض وذكر صلاح  
على أرض قلبه الفجر لاح  
والأمن في إيمانه سكن

## السمرا

ليل يا ليل كانت بتبكي  
شاهدوا بنت النيل بتبكي  
كانت السمرا بتبكي

وابتسم له الياسمين  
ليه يا نور العين

من سنه وشهرين سجين  
من سنه وشهرين

يا للي أضناك الحنين  
له على ضلوعى رنين

عزف اللحن الحزين  
وذكرت المساجين

مين ومين أبكي ومين

وحبيبتة بعيدة عنهُ  
وحبيبتة بعيدة عنهُ  
وحبيبتة بعيدة عنهُ

تاجروا بيها السجانين  
في الليالي المظلمين

والرياح سايقه الأئين  
في أودنا وبردانين

وان تولوا البطاطين  
في نواحي المصارين

في المفاصل سكاكين  
من ضلوع الجعائين

إحنا أوهام والا طين

والقرف زي ما كان

قبل ما نجومك يطلوا  
ونجومك لما هلوا  
بعد ما نجومك تولوا

طلع الفجر وقله  
ليه يا سمرا النوح دا كله

قالت السمرا وليفي  
وانا دمع العين حليفي

شاعره وكللك حنان  
دمعك الغالي المهان

وعلى ضلوعي كلامك  
لما طال قلبي ملامك

كلهم في الزنازين

أنا في السجن صديقي  
وانا في السجن شقيقي  
الليالي تروح وتيجي

وحياته ولقمته  
واستبدت محنته

في ليالي الزمهرير  
إحنا نايمين ع السرير

ومالوش م البرد مهرب  
والديزونتريا بتلعب

زرع البرد شتاه  
نزع السل غذاه

تحت رجل المجرمين

سخط أمواجه طمت

والغلا زاد عما كانُ

وجسومنا تحطمت

والشقا في كل مكانُ

والبتامى اتلطمت

الغلابا المساكينُ  
عن شمالك واليمينُ

الشقا في كل مكان  
في المصانع والغيطان

ولأ حازي الفدادينُ  
الشقا ملازم رهينُ

تاه في لفات الحواري  
عند جاري وجوه داري

فاتها سحر العناوينُ  
وللأسى نخلفَ بنينُ

إحنا في الدنيا مآسي  
جينا للدنيا نقاسي

سرحوه المترفينُ  
ع اللواتي والذينُ

بؤس مجهول المدى  
والألوف رايحه كدا

أي مله وأي دينُ

يا نصارى ومسلمينُ

والغنى من التخمه يشكي  
والغنى من الراحه يشكي  
وان شكيت في السر إشكي

تقبل العيل يجوع  
تقبل العامل يصوع  
ودا مفروض له الخضوع

حرّكت همّي الدفينُ  
جوعه والفقر المهينُ

ضجه من همس الحزائى  
وجعان يشكي لجعانه

في الضلام المستكينُ  
صبح السجن عرينُ

وبكا السمرا ونحيبها  
ما درتش انه بحبيبها

صبا معدود السنين  
يعرفوها المظلومينُ

وحرام تقضي في مناحه  
في صحارى الهم واحه

شعت الدفء المعينُ  
خمسيت مره السجينُ

اسمها البسام أمل  
قدي.. لأ.. قدي احتمل

في انتصار الملايينُ

ما زادوش إلا يقين

الليالي كحل  
والقضببان مرآود

ماتوا عشاق العيون العسلية  
والعيون السود يا عشاق العيون  
في عيون زينب وفاطمة اسماعيلية  
مساكنها قبور وابوابها سجون

في عيون زينب وفاطمة وعائشه ميتم  
في عيون ليلى ليالي اربعين  
في عيون انصاف وفتحيه ومريم  
السهر والحزن في الليل الحزين

في عيون انصاف وفتحيه ومحاسن  
مات ربيع الحب وارتاحوا الطغاه  
عصف النسيان بأزهار الجنائين  
عصف الطغيان بأزهار الحياه

في عيون ورده دموع غير الندى  
ودموع أضعف من القلب الضعيف  
ودموع نرجس مآسي مجردة  
ودموع نرجس كأوراق الخريف

ودموع ياسمين بتلطم خدّها  
خدّها الياسمين صبح لون الدموع  
ودموع سوسن ثواني تعدّها  
جسمها يدوب زي ما تدوب الشموع

شم لو تقدر تشم في مصر زهره  
وانظر البدر شريد ع الأفاريز  
واسمع الموت أعلى صوت في مصر واقرا  
في عيون مصرية ظلم الإنجليز

يا للي شفت في سجن مصر عيون حنان  
تحت وطء الدمع والحزن المعاود

ارتدت ثوب الحداد قبل الأوان  
الليالي كحل والقضبان مراد

شوف في مصر السجن مصر المعتقل  
مصر قطاع كفر عبده وبهوت  
في عيون مصريه أطلال الأمل  
سؤال الناس نعيش والأ نموت

وسؤال الناس نموت ولأ نعيش  
في عيون أختك وأختي الملايين  
في عيون العاملات تشقى لمايش  
وحبييتي السمرا بنت الفلاحين

أنا شفت الدمع في عيون جمالات  
السجون كلها والمستشفيات  
الجراح المستبده والعاهات  
أنا شفت الدم في عيون جمالات

ينابيع الحب بتسيل جراحي  
أنا بائس أنا مسكين أنا شاعر  
أنا مطعون قلبي من كل النواحي  
لما شفت الدمع في عيون أختي ساهر

آه يابا من وجودي وآه يابا  
من شعوري وآه يابا من عيوني  
اللي بيعيشوا على دموع الغلابة  
يابا ودموع الغلابة قتلوني

**فبراير 1952**

ارفعي جبينك يا أختي بيتسم له  
شاعر الوادي ونيله وأخضره  
الشهيد الحي بكره ننتقم له  
والسجين الحر بكره نحرره

**أغسطس 1952**



## نصيحة

بعد ما اتعشوا فراخ وديوك وحلوا  
واسأل العيش إن كان ابن نفيسه بلُّه  
مال رسول الحرب ع الباشا وقال له  
إنت لازم تفتح الطور من جديد

إنت سامع إنت فاهم دي نصيحة  
دي أوامر جايه من لندن صريحه  
شيوعيه في بلد مسلم فضيحة  
وعدداهم كل يوم عمال يزيد

إحنا لو نعطيها للباشا فلان  
يفتح الطور وعيون موسى كمان  
والهايكستب ولكن من زمان  
إحنا مالناش غيرك انت يا سعيد

افتح الطور السجون لأ مش كفايه  
الولد لازم تربيته بالعصايه  
والمفاوضه تدن فوضى للنهائيه  
والبلد تحكمها باليد الحديد

## لازم تحلم

ممکن تحلم إن القضبان من نفسها انهدتُ

ممکن تحلم إن القضبان اتمدت سكه حديدُ  
وركبت القطر وقلت أزور  
السلم والعلم وبلاد المجر

وبلاد العيد فيها عيد  
معجزات العدل والحب والشرانق والزهور  
وأغاني النول وأعمال الوتر

ممکن تحلم إن القضبان صبحت عواميد  
طلعت للسماء وطلعت عليها عليت على كل الطيور  
وظلعت النجوم والقمر

ممکن تحلم إن القضبان في الفجر سعاة البريد  
حاملين أشواق وسلام وقُبل حررها النور  
تقراها توشوش في ودانك أوراق الشجر  
ممکن تحلم لما تغمض عينيكُ  
لما تفتح عينيكُ  
لازم تحلم بفجر ثاني كبير

بايدينا خلف وخارج القضبان بتهدّها  
وايدين لحرب الظلم والطغيان بنمدّها  
علشان يمد لنا السلام إيدّه

لازم تحلم بالمطارق في الكفاح  
عشان تحلم بالمطارق في السلام  
وتعيش وتبني وتحكم ع الحديدُ

لازم تحلم بالمناجل في الكفاح  
عشان تحلم بالمناحل في السلام  
وتعيش بين أشعة شمس وسنابل شمس الأرض

## الشاطر حسن

اركب حصانك يا شاطر حسن  
في السجن ست الحسن والجمال  
أسيره من أربع شهور طوال  
بينك وبينها الصخر والرمال  
اركب حصانك يا شاطر حسن

واحمل حُسامك يا فتى العرب  
بينك وبينها الحارس الغبي  
والباشا والمملوك والأجنبي  
الله أكبر صلِّ ع النبي  
واحمل حسامك يا فتى العرب

الليل طويل والنور ضئيل ولو  
سيفك معاك وحصانك الطليق  
درعك إيمانك والقلب الجريء  
والشوك بشير الورد في الطريق  
الليل طويل والنور ضئيل ولو  
صَوَّب مسيرك دوغري للهدف  
ما تلتفتش لغنوة الغصون  
ما تتخدعش بمية العيون  
إوعى النعاس في الضلمه والسكون  
صَوَّب مسيرك دوغري للهدف

اسرع سريع اسبق مستقبلك  
في السجن ست الحسن ملوَّعهُ  
بين الأمل واليأس مقطَّعهُ  
بتعد أيامها المضيعهُ  
اسرع سريع اسبق مستقبلك

اجعل إيديك فلاحه الأمل  
انفض عن المحزونه حُزنها  
بعثر قمر ونجوم في حُضنها  
ورَّد تاج الشمس لُحسها

اجعل إيديك فلاحه الأمل

واركب حُصانك يا شاطر حسنُ  
الشمس طالعه من ورا الجبالُ  
الحق حَقك والنضال نضالُ  
من أجل ست الحسن والجمالُ  
اركب حصانك يا شاطر حسنُ

كان شعبي مسجون

كان فاروق سجان

ليه ما قبلتش أعبد الأوثان

ليه ما اكتفتش بأضعف الإيمان

سجنوني

ليه قلبي مصري وعيني مصريه

وحياتي كلمه في خدمة الأوطان

سجنوني

طالب بعدل ونور وحرية

وبهدمه للعريانه والعريان

وبراحه للعرقانه والعرقان

ويرحمه للعطشانه والعطشان

ويساعه للغلبانه والغلبان

من إنسانيه يعيشها كالإنسان

سجنوني

ليه الطيور بتغني ع الأغصان

لحن السلام وروائع الألحان

سجنوني

ليه مش خسيس مش وغد مش حيوان

سجنوني

ممنوع أقول للحق إنت الحق

وأشوف مرآي العين من الأحزان

أو أسمع المسموع من الأشجان

ما رضيتش أعيش من غير عيون وودان

ما رضيتش اعيش من غير فؤاد ولسان

سجنوني

ليه قلت طرد الطاغي في الإمكان

ليه قلت هان الطاغي قبل ما هان

سجنوني

كان صدقي بيفن عمرو إيدن كان

عهد الضلام والبغي والطغيان

كان شعبي مسجون كان فاروق سجان

سجنوني

أغسطس 1952